

## ■ COLUMNA

# Saun giudizi

DA ROMAN CAVIEZEL\*

**B**ain bain, las bancas èn schon relevantas per noss sistem. Er sch'i na pajan pli gnanc in miserabel cotschen tschains per noss bluzchers spargnads. Ellas han eba auters quitads, las povras. Faschai vus ina giada tants scandalins e scandaluns e cugliunims e bonis excessivs e contos nairs e gudogns exorbitants ed investiziuns en affars criminals etcetera etcetera, alura vezzais. Per mai è quai tut okay, affar è affar, impurtant è mo quai che stat sut il stritg. Nossa piazza da finanzas gioga en la champions league, e quai è il pretsch, e basta. Richesse oblige. Uschè simpel èsi.

**P**erò, tgi avess pensà che schizunt ils esters daventassan in bel di relevantas per noss sistem? Il pli davos mettain ils Röstis e cumpania. Bun, per esser sincer, be per il sistem da l'economia d'alp, aber tuttina, relevant è relevant. Mettai avant: Questa stad vegnan passa 400 extraconfederads – e pir anc cun uffants – ad inundar las tegias d'alp grischunas! Pasters e



portgers talians, tudestgs, austriacs, tut tge che vus vulais, in terz da l'effectiv total e simplamain uschia. Dramatic, navaira? Sch'ins avess prevesì la pandemia, avess ins magari pudì recrutar in u l'auter dischoccupà, aber uschia, nunpussivel. Almain stoni frequentar in curs da far chaschiel e paintg avant che laschar or il portg (stgisai!) sin nossas bellas runtgas. Ed anc insatge en confidenza: Per fortuna fan las vatgasmamma puncto frequenza en il fratemp or dapli che quellas da latg! Nagut encunter tilsiter e gorgonzola, bainchapi, ma n'avais vus betg er bregia d'as imaginar in signun bergamasc a far in autentic chaschiel da l'alp Stavonas, maindir ina

zezna tudestga da Hamburg u da Kiel? La relevanza ha er sias varts umbri-vaunas (vesair sura).

**E**d alura pir il rivaun! Vos savais schon, quel benedi toc utschè che na sa far nagut pli perdest che s'ignivar precis ed exclusivamain en la Ruinaulta ed impedir la fabricaziun dad ina bella senda da viandar tranter Versomi e Trin! Er quel duess uss esser sistem-relevant!? Da rir da schluppar. E tgi pensa als povers turists da las citads che vegnan quattras drasticamain privads da lur dretg da mobilitad e dal giudiment illimità da la natira? Els che han nair basegn da sa recrear, e che fissan er pronts da pajar persuerter. In scandal nunditg! Na, jau sun profundamain trumpà. Tge societad monstrusa è quai che plazzescha il baincuar d'in pèr povers «flussuferliufers» sur ils basegns pli che giustificgads dals umans?! Mes reginavel per in zic saun giudizi!

**\*Roman Caviezel è anteriur scolast gimnasial e dapi l'onn 2014 commember da la giuria dal Premi svizzer da litteratura.**